

# Regiun Surselva: 17 vischnauncas – in'idea

La Regiun Surselva festivescha siu 50avel anniversari cun in program variont

DA MARTIN CABALZAR

■ Dapi igl onn 1967 s'engascha la Regiun Surselva per promover las kundiziuns economicas, culturalas e socialas dalla regiun. La Regiun Surselva cumpeggia actualmein 17 vischnauncas, siu territori tonscha da Laax entochen alla tgina dil Rein al Péz Badus, inclus las valladas lateralas Lumnezia, Stussavgia e Medel. Tenor il meinagestiu Duri Blumenthal sesprova la Regiun Surselva d'exequir a moda efficients las incumbensas surdadas ad ella dallas vischnauncas e dil cantun. La collaboraziun vegn reglada entras cunvegns da prestaziun ch'obligheschan suletta-mein las vischnauncas pertuccadas. Ella conferenza dils presidents ein tut ils presidents communalas dalla Surselva representai. La cummissiun regiunala che consista ord il president e quater commembers dalla conferenza da presidents ei il gremi executiv dalla Regiun. Il secretariat regional funcziuna sco post da stab ton per la conferenza dils presidents communalas sco per la cummissiun regiunala, el exequescha las incumbensas operativas e meina las finanzas e la contabilitad

**Adina dapli camps d'activitad**  
Oriundamein ei la Pro Surselva vegnida fundada per promover la scolaziun musicala ed igl agid da famiglias. Pli tard ein la dismessa da rumians e la planisaziun regiunala vegnidada vidlunder. Oz cumpeggia l'administraziun dalla Regiun Surselva il post per il svilup regional, l'economisaziun da rumians, il Center da formaziun, la Curatella professiunala, igl uffeci dil studi civil ed igl uffeci da stumadira e concuors.  
Il post per il svilup regional occupava dad Urs Giezendanner elavura concept e realisescha mesiras per mantener e sviluppar vinavon la Surselva sco spazi eco-



Aposta per la fiasta giubilara da 50 onns Regiun Surselva presentan scolaras e scolaras dil Center da formaziun Surselva in niev rapp che duei daventar in veritabel «himni sursilvan».

FOTO O. ITEM

nomie e liug d'habitar attractiv. Ses camps strategics ein: revitalisar il turissem, augmentar l'attractivitat sco liug d'habitar, sviluppar vinavon il provediment ed optimar la situaziun da traffic. Dapi igl onn 2008 ha il post saviu intermediar 21,3 milliuns francs daners publics per 37 differents projects.  
La finamira dall'economisaziun da rumien dirigida da Duri Blumenthal e Conrad Lutz ei da promover la dismessa adattada, il recicladi che schanegia igl ambient e da nezegiar il rumien sco fontauna d'energia.  
Avon entgins onns ein differents pensums che vegnevan adempdi entochen uss dils cumins vegni adossai alla Regiun. La Curatella professiunala Surselva vegn di-

rigida da Gioni Collucello, igl uffeci civil da Peter Gallmann ed igl uffeci da stumadira e concuors dad Albert Chistell.  
**Center da formaziun Surselva**  
Il Center da formaziun Surselva dirigius da niev da Peter Kreiliger ha l'incumbensa da procurar per ina buna purschida da formaziun enteifer la regiun e da metter a disposiziun survetschs da formaziun, terapias e promoziun. El dispona d'in budget da rodund siat milliuns, dumbra rodund 100 collaboratur e vegn frequentaus tut en tut da rodund 1150 scolaras. Il Center da formaziun Surselva cumpeggia tschun spartas: La Scola professiunala Surselva dirigida da Hans-Giacun Spescha, la Scola mercan-

tila Surselva (scola media mercantila, scola media propedeutica, scola professiunala commerciala e scola mercantila dil gi) cun Marcus Beer sco menader, la Scola professiunala industriala cun Alois Derungs alla testa, la Scola da musica Surselva cul menader Claudio Simonet ed il Survetsch logopedic dirigius da Lucia Lechmann Carigiet.  
**Turnea sco preludi per la fiasta da giubileum**  
Sco partenza per la fiasta da giubileum ha ina pintga turnea liug tras entginas vischnauncas sursilvanas. Scolas e scolaras dil Center da formaziun Surselva fan mingamai in stop sils plazs da pausa dalla scola Sedrun (18 da settember),

dalla Scolaviva Laax (19 da settember), dalla scola Valendau (20 da settember) e dalla scola da Val S. Pieder (21 da settember). Duront la pausa gronda presentan els ensemen cun Ivo Orlik che ha arranschau il rapp «Surselva» ensemen cun Sandro Dietrich e cul sustegn dil scolast da musica Retus Pfister. Sin quella turnea vegnan ils scolaras – cun agid da lur scolasts Remo Albert Alig, Claudio Bundi ed Aluis Tambornino a crear ina «Street-Art-Performance» cun informaziuns e cefras davart la Regiun Surselva. Las occurrenzas ellas scolas vegnan ad esser publicas.

## Fiasta populara e gi dallas portas aviatas

El center dallas festivitads stat la sonda suentermezdi dils 23 da settember. Sut il motto «Il tun dalla regiun» vegnan scolaras e scolaras dil Center da formaziun Surselva e dalla Scola da musica Surselva cun lur band da scolaras, la brassband Brassorama ed igl orchester da juvenils Acodra a porscher differents produziuns ed inscenaziuns. Els vegnan accompagnai dalla giuvna actura Gionina Spescha e dil juven actur Denis Marmy.

Per accentuar la gronda impurtonza dallas scolas tier la Regiun Surselva ei planisau ina discussiun da podi cun prominents anteriurs scolaras. Sina Candrian (snowboardista, Flavia Schnoz (miradura e victura dil campiunadi da mistregn GR), Romina Dietrich (SFX makeup artist), Marcus Caduff (schef operativ Spital regional Surselva), Paul Monn (directur responsabel KMU tier Credit Suisse) e Fabio Bianchi (impresari) raquantan da lur carrieras. Ina tura guidada tras il baghetg d'administraziun dalla Regiun Surselva alla Via dil Glogn a Glion dat l'ocasiun da mirar davos las culissas e da s'informar davart ils differents survetschs.

# Degustar e cumprar caschiel d'alp a Glion

Sonda proxima presentan nov alps sursilvanas il caschiel dalla stad 2017

■ (anr/sr) Sonda proxima – ils 2 da settember dallas 08.30–16.00 – envidan ils representants da nov alps sursilvanas all'exposiziun da caschiel d'alp a Glion sin piazza-fiera. Leu presentan ei il caschiel da questa stad, laian degustar e vendan secapescha era bugen ina buccada. Culs onns ei l'exposiziun da caschiel d'alp a Glion daventada in punct fix en l'agenda dils amaturas da caschiel ed era passants e hospis selegran dalla varietad. En cumbinaziun culla fiera jamnila a Glion ha quella liug uonn gia per la dudischavla ga. El center vegnan ils products ch'ei madirai duront la stad els tschalers da caschiel

dallas differents alps sursilvanas a star. Ils amaturas dil caschiel d'alp astgan selegrar sin ina emprema degustaziun la sonda sin piazza-fiera. Amogna lur products fan ils representants dall'Alp Kleinguraletsch da Val Sogn Pieder, Alp Naustgel da Sumvitg e dall'Alp Nova en Lumnezia ensemen cun quels dall'Alp Parvalsauns da Vrin, Alp Puzetta da Medel, Alp Ruschein, Alp Sezner da Vignogn, dall'Alp Stavonas-Prada da Sursaisa e dall'Alp Peil en Val Sogn Pieder. Ella rama dalla fiera jamnila Glion che ha liug mintga sonda selegran ils representants da quella alps da presentar ina schelta dalla produczion actuala e



Sonda, ils 2 da settember dallas 08.30–16.00 ha l'exposiziun da caschiel d'alp liug sin piazza-fiera.

FOTO S. ROTHMUND

da vender las empremas buccadas tochen entiras magnuccas. Igl ei gia la dudischavla ga ch'is organisatur, in comite d'organizaziun cun representants dalla fiera jamnila Glion, dall'Uniu purila Surselva e dallas Puras dalla Surselva organisescha quella occurrenza. Secapescha vegn era organisau ustria ed in program da divertiment per pign e grond. Aschia san ils affons per exempel far ina turetta sin asens ed emblidar il temps duront decorar figuras da paun. Sin tuts spetga ina tombola cun ina magnucca caschiel d'alp sco premi principal e secapescha vegn tut quei enramau cun musica populara.

reclama



AHV-Scheinreform

2×NEIN

Heutige Rentner bezahlen für diese Reform, bekommen aber keine höhere AHV.

Den Jungen bleibt der Schuldenberg.

Ungerecht für Jung und Alt

www.generationenallianz.ch